



Sud Bosne i Hercegovine
Суд Босне и Херцеговине

Broj: S1 3 Iž 043720 22 Iž
Sarajevo, 18.08.2022.godine

Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović kao predsjednika vijeća, Dinke Bešlagić-Čovrk i Zvezdane Antonović kao članova vijeća, odlučujući o žalbi Aleksandre Ignjatić, ... R., izjavljenoj protiv odluke Centralne izborne komisije Bosne i Hercegovine broj: 06-1-07-3-909/21 od 02.06.2022.godine, zbog nepodnošenja prijave o imovinskom stanju, u nejavnoj sjednici, održanoj dana 18.08.2022.godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je žaliteljica odgovorna što u 2020. godini nije Centralnoj izbornoj komisiji Bosne i Hercegovine podnijela izjavu o imovinskom stanju u roku od 30 dana od dana prestanka mandata, čime je prekršila odredbu člana 15.8 stav (2) Izbornog zakona Bosne i Hercegovine, pa joj je na osnovu člana 6.7 stav (1) tačka 1 i primjenom člana 19.10. stav (1) tačka b) Izbornog zakona BiH izrečena novčana kazna u iznosu od 500,00 KM.

Protiv ove odluke Aleksandra Ignjatić je uložila žalbu u kojoj navodi da izjavu o imovinskom stanju nije podnijela iz razloga što nije bila upoznata sa tom zakonskom obavezom, a da jeste, svakako bi blagovremeno dostavila predmetnu izjavu. Pored navedenog ističe da poziv za izjašnjenje, a koji joj je uputila Centralna izborna komisija BiH, nikada nije primila te traži da se utvrdi ko je navedeno pismeno preuzeo. Napominje da je njeno imovinsko stanje isto kao i na početku mandata i da ne posjeduje ni pokretnu ni nepokretnu imovinu, već samo prima mjesečnu platu u firmi u kojoj je bila zaposlena i prije mandata.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Žalba nije osnovana.

Imajući u vidu relevantne propise i to odredbe člana 15.8 stav (1) i (2) Izbornog zakona BiH („Službeni glasnik BiH“ broj 23/01 do 31/16), Sud je utvrdio da je odluka CIK-e BiH pravilna i zakonita.

Odredbom člana 15.8 stav (1) Izbornog zakona BiH propisano je da su kandidati izabrani na svim nivoima vlasti dužni da u roku od 30 dana od dana objave ovjere mandata u Službenom glasniku BiH, predaju Centralnoj izbornoj komisiji BiH potpisanu izjavu o imovinskom stanju iz člana 15.7 navedenog zakona i da u skladu sa navedenom odredbom u stavu (2) Centralnoj izbornoj komisiji BiH podnese izvještaj o imovinskom stanju u roku od 30 dana nakon isteka mandata na koji je izabran, kao i u slučaju prestanka mandata u smislu člana 1.10 stav (1) tačke 1),4),5),7) i 8) navedenog zakona u roku od 30 dana od dana prestanka mandata.

Uvidom u spise predmeta ovo vijeće je zaključilo da je donosilac ožalbene odluke pravilno utvrdio da je žaliteljica odgovorna za nepravilnosti učinjene iz citirane zakonske odredbe, tim prije što nije dostavila izjavu o svom imovinskom stanju u zakonskom roku, tj. do 15.12.2020. godine, a ni po upućenom pozivu od strane CIK BiH od 15.12.2021. godine u ostavljenom roku od 15 dana nije dostavila izjašnjenje vezano za razloge nedostavljanja izjave o imovinskom stanju, nego je svoju izjavu o imovinskom stanju dostavila tek u prilogu svoje žalbe.

Opisanim postupanjem žaliteljica je počinila prekršaj iz odredbe člana 15.8 stav (2) Izbornog zakona BiH, pa joj je pravilnom primjenom materijalnog prava odredbe člana 6.7 stav (1) tačke 1) i odredbe člana 19.10 stav (1) tačka b) Izbornog zakona BiH izrečena novčana kazna u iznosu od 500,00 KM, koja je u okvirima zakonskog minimuma srazmjerna učinjenom prekršaju.

U pogledu žalbenih navoda kojima ukazuje na nepravilnosti u dostavi Zaključka od 15.12.2021. godine, CIK BiH je pravilno utvrdio da je predmetni zaključak žaliteljici u dva navrata upućivan na istu adresu i oba puta je pismeno vraćeno sa naznakom „odselio“. Istovremeno, ožalbena Odluka od 02.06.2022. godine je poslana i uručena na istu adresu, pa se zaključuje da pismeno nije uručeno drugoj osobi.

Iz navedenih razloga Apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

PREDSJEDNIK VIJEĆA
S U D I J A
Vesna Trifunović